

Siunnersuummut nassuiaatit

Nalinginnaasumik nassuiaatit

1. Aallarniut

Siunnersuut 2020-mi aningaasanut inatsit pillugu isumaqatigiissutip ilagaa.

Akitsuutit ineriartortitsinissamik kissaatigineqartunut ikorfartuutaanissaat nunani tamalaani akuerisaavoq. Nioqqutissamut akitsuut qaffanneqarpat nioqqutissap akia qaffassaaq innuttaasullu nioqqutissamik pineqartumik atuinertik annikillisikkajuppaat imaluunniit toqqagassanik allanik ujarlertarlutik. Sunniutissat taakku siunnersuummi matumani anguniarneqarput.

Ataatsimut isigalugu innuttaasut peqqissusiata avatangiisittalu mianerisassat pitsanngorsarneqarnissaannut siunnersuut peqataaqataassaaq.

Aningaasaqarneq pillugu Siunnersuisoqatigiit 2019-imi ukiumoortumik nalunaarusiaminni peqqinnissamut suliassaqarfimmi aningaasartuutit tatineqarnerat qanoq iliuuseqarfigineqarsinnaanersoq immikkut sammisami oqaatigaat eqqussuinnermut akitsuutit annertussusiat misissorneqarluarsinnaasoq.

Taamaalilluni siunnersuisoqatigiinnit oqaatigineqarpoq:

"Cigaretinik aamma tupanik eqqussuinnermi akitsuutit ukiumut 150 mio. kr.-t missaaniipput, ukiorpaalunnilu atuinikinneruneq pissutaalluni akitsuutikkut isertitat appariartuaarsimapput. Peqatigisaanik tupamut akitsuutit annikillisimapput, taakkumi inuiaqatigiinni akinik ataatsimut isigalugu ineriartornermut ilaatinneqarsimangillat. Tupanut akitsuutit 2007-imili allangortinneqarnikuunngillat, taamaammallu inuiaqatigiinni ulluinnarni nioqqutissanut allanut arlaqartunut sanilliullugu tupa akikinnerulersimavoq. Tupamik annikinnerusumik atugaqalernissamut anguniagaqarusunneq taamaalilluni killumut ingerlasimavoq. Isumaliutigineqassaaq maannamut iliuutsinut sanilliullugu ataatsimut isigalugu tupamut akitsuutit qaffanneqarnerisa kingunerisaanik tupamik atuneq sunniuteqarluartumik minnerunngitsumik inuusuttut akornannut tunngatillugu iliuuseqarfigineqarsinnaanersoq. Tupat akii ullumikkut qaffasereerput peqatigisaanillu atuneq aamma qaffaseqaluni. Tikkuussisoqarnikuuvoq pujortarneq akiorniarlugu siamasissumik iliuuseqarnissaq pisariaqartoq, tamatumanilu annertunerusumik akitsuusersuineq siunnerfilimmik suliniutaasinnaavoq."

Aningaasanut inatsimmik isumaqatigiissuteqartut taama isumaqarneq tunngaviatigut isumaqatigaat aammalu ilaatigut tupamut, imigassamut sukkumullu atatillugu kinguaattoorutit taakku ilaasa angumeriniarnerisigut peqqinnarnerusumik inooriaaseqarnissaq aningaasanut inatsit pillugu isumaqatigiissut aqqutigalugu siuarsarniarneqarluni. Akitsuutit qaffasinneruppata nioqqutissanik peqqissutsimut ajoqutaasinnaasunik taakkuninnga atuneq

appariaateqassasoq ilaatigut naatsorsuutigineqarpoq, tamatumalu peqatigisaanik siunertanut allanut atugassanik aningaasanik pissarsiviunissaa, tassungalu ilanngullugu iliuusissanik inuiaqatigiit attanneqarsinnaanerusumik ineriartortinneqarnissaannut siunissamilu ungasissumi naalackersuinikkut anguniakkanut ikorfartuutaanissaat naatsorsuutigineqarpoq.

Aningaasanut inatsit ataatsimut isigalugu allannguutininik imaattunik nassataqassaaq:

- Sukkumut, sukkulaatinut mamakujunnullu akitsuutit kiilumut ataatsimut 5 kr.-nik qaffanneqarnerat.
- Tupamik tunisassianut akitsuutit 10 pct.-imik qaffanneqarnerat.
- Imigassanut aalakoornartortalinnut akitsuutip 10 pct.-imik qaffanneqarnera.
- Qamuterallannut ATV-nullu akitsuutip 1. januar 2021-mit atorunnaarsinneqarnera
- Puussiat plastikkit 5 liiterit ataallugit angissusillit eqqussorneqarnerannut akitsuut nutaaq puussiamut ataatsimut 2 kr. aammalu puussianut anginernut 3 kr.
- Nittarsaassinermit naqitikkani illoqutigiinnut agguassassanik eqqussuinermit akitsuut nutaaq kiilumut ataatsimut 5 kr.

Qamuterallannik ATV-nillu eqqussuinermit akitsuutip atorunnaarsinneqarnissaa UKA 2019/54-ip oqaluuserineqarnerani amerlasuunit taparserneqarpoq. Tamanna siunnersuummi matumani ilanngunneqarpoq.

Ukiumoortumik puussiat plastikkit assigisaallu 5 millionit missaannik amerlassusillit nunatsinnut eqqunneqartarput. Puussiat amerlanersaat ataasiaannarlugit atorneqartarput, tamatumalu kingorna iginneqartarlutik imaluunniit pinngortitami illoqarfimmiluunniit takussaasumiittarlutik. Puussiat igitat pinngortitamut mingutsitsisarput, soorluttaaq uumasut timmissallu nujuartat plastikip ilaanik iisigunik ajoquserneqarsinnaallutik. Taamaalilluni atortussat taamaattut pinngortitap ataqatigiinneranut naggataatigullu inuussutissanut akuleruttarlutik.

Assersuutigalugu puussianut plastikinit akitsuuteqartitsineq atuinermik killiliisartoq aammalu avatangiisinut ajoqutaanninnerusunik, soorlu pooqattanik atorneqarsinnaasunik, puussianik annoraaminnermit sanaanik, nammattakkanik assigisaannillu atuinissamut kajumissuseqalersitsisartoq nunani allani misilittakkat takutippaat.

Ussassarutininik naqitanik inoqutigiinnut agguanneqartartunik eqqussuinermit akitsuuteqartitsinikkut avatangiisinut iluaqutaasumik pappiaqqat iginneqartartut ikilinerannut peqataaqataassaaq aammalu najukkami ingerlatanik atuinissamut kajumissuseqalersitseqataasinnaalluni.

Aammattaaq siunnersuutip matuma peqatigisaanik imigassat ilaannut Kalaallit Nunaanni sananeqarsimasunut akitsuutit pillugit Inatsisartut inatsisaata aammalu qamutit motoorillit akileraarutaat pillugu Inatsisartut inatsisaata allanngortinneqarnissaanik siunnersuut saqqummiunneqarpoq.

2. Siunnersuummi immikkoortut pingaernerit

Tupamut akitsuutit 2007-imili iluarsiivigineqanngillat. Piffissap tamatuma ingerlanerani atuisunut akigititat 20 pct.-imik qaffariaateqarput. Tamannalu tunngavigalugu akitsuutinut annertussuserititat taakku 10 pct.-imik iluarsiivigineqarnissaat naammaginatutut isigineqarpoq. Tupamik atuinerup annikillisinneqarnissaa taamaalillunilu innuttaasut peqqissusiata pitsanngorsarneqarnissaa naalakkersuinerimik ingerlataqartunit annertuumik kissaataavoq. Nunatsinni suli amerlavallaat pujortarpallaarput.

Imigassamut aalakoornartortalimmut akitsuutit 2007-imili iluarsiivigineqanngillat. Tamannalu tunngavigalugu akitsuutinut annertussuserititat taakku 10 pct.-imik iluarsiivigineqarnissaat naammaginatutut isigineqarpoq. Naak ukiualuit ingerlaneranni imigassamik atuineq annikilligaluartoq atuineq suli annertuvoq aammalu annikillisinniaqqinnissaata sulissutigineqarnissaanut suli tunngavissaqarluni.

Aamma sukkumut akitsuutit 2007-imili suli allanngortinneqanngillat. Naak eqqussuineq ukiut kingulliit tallimat ingerlaneranni patajaakanneraluartoq atuineq annertuvoq, taamaattumillu annikillisinneqarnissaanut aningaasaqarnikkut kajumissuseqalersitsinissaq pingaaruteqarpoq.

Aammattaaq sukkulaammut akitsuutit atuinerup annikillisinneqarnissaa siunertaralugu iluarsiivigineqarput. Matumani aamma eqqussuineq ukiut kingulliit 5-it ingerlaneranni patajaakannersumik inissisimavoq. Atuinerup annertunera ingerlaannarpoq, taamaattumillu annikillisinneqarnissaanut kajumissuseqalersitsinerunissaq pingaaruteqarpoq.

ATV-nik qamuterallannillu eqqussuinerimik akitsuutit UKA 2019/54-ip oqaluuserineqarnera tunngavigalugu atorunnaarsinneqassasut siunnersuutigineqarpoq.

Inatsisissatut siunnersuut inatsimmut atuuttumut sanilliullugu	
<i>Oqaasiliorderiti atuuttut</i>	<i>Inatsisissatut siunnersuut</i>
	§ 1 Nioqutissanik eqqussuinerimik akitsuutit pillugit Inatsisartut inatsisaanni nr. 19, 30. oktober 1992-imeersumi, ilaatigut inatsisartut inatsisaatigut nr. 8, 19. oktober 2007-imeersumi, Inatsisartut inatsisaanni nr. 21, 23. november 2015-imeersumi kingullermillu Inatsisartut inatsisaanni nr. 2, 25. maj 2016-imeersumi allanngortinneqartumi imaattunik allannguisoqarpoq:
Nr. 1. Sukkunik nioqutissiat suullunniit,	1. § 1, imm. 1, nr. 1, ima oqaasertalerneqassaaq:

<p>tamatumani ilaallutik sirup aamma glukose kg.-mut 6 kr. 00 øre.</p>	<p>”Sukkunik nioqutissiat suulluunniit, tamatumani ilaallutik sirup aamma glukose kg.-mut 10 kr. 31 øre.”</p>
<p>Nr. 2. Sukkulaatit sukkulaatinillu nioqutissiat suulluunniit (cacao pinnagit), lakridsit lakridsinillu nioqutissiat suulluunniit, marcipanit marcipaninillu nioqutissiat suulluunniit, karamelit, bonbonsit, sukkuvaqqat assigisaallu, sukkullit sukkoqanngitsullu kg.-mut 58 kr. 00 øre.</p>	<p>2. § 1, imm. 1, nr. 2 ima oqaasertalerneqassaaq: ”Sukkulaatit sukkulaatinillu nioqutissiat suulluunniit (cacao pinnagit), lakridsit lakridsinillu nioqutissiat suulluunniit, marcipanit marcipaninillu nioqutissiat suulluunniit, karamelit, bonbonsit, sukkuvaqqat assigisaallu, sukkullit sukkoqanngitsullu kg.-mut ...63 kr. 00 øre.”</p>
<p>Nr. 3. Imigassat ethanolimik akullit ima imallit: a) 2,25-3,09 volumenpct. literimut 2 kr. 95 øre, b) 3,10-4,09 volumenpct. literimut 6 kr. 42 øre, c) 4,10-5,09 volumenpct. literimut 17 kr. 04 øre, d) 5,10-7,09 volumenpct. literimut 23 kr. 87 øre, e) 7,10-9,09 volumenpct. literimut 34 kr. 22 øre, f) 9,10-12,09 volumenpct. literimut 48 kr. 06 øre, g) 12,10-15,09 volumenpct. literimut 65 kr. 84 øre, h) 15,10-18,09 volumenpct. literimut 85 kr. 42 øre i) 18,10-22,09 volumenpct. literimut ... 109 kr. 56 øre j) 22,10-26,09 volumenpct. literimut ... 138 kr. 68 øre k) 26,10-30,09 volumenpct. literimut ... 170 kr. 22 øre, l) 30,10-35,09 volumenpct. literimut ... 207 kr. 35 øre, m) 35,10-45,09 volumenpct. literimut ... 267 kr. 17 øre n) 45,10-60,09 volumenpct. literimut ... 366 kr. 53 øre,</p>	<p>3. § 1, imm. 1, nr. 3 ima oqaasertalerneqassaaq: ”Imigassat ethanolimik akullit ima imallit: a) 1,21-3,09 volumenprocent. literimut..... 3 kr. 85 øre b) 3,10-4,09 volumenprocent liiterimut..... 8 kr. 80 øre c) 4,10-5,09 volumenprocent liiterimut..... 23 kr. 00 øre d) 5,10-7,09 volumenprocent liiterimut..... 33 kr. 00 øre e) 7,10-9,09 volumenprocent liiterimut..... 47 kr. 25 øre f) 9,10-11,09 volumenprocent liiterimut 61 kr. 50 øre g) 11,10-13,09 volumenprocent liiterimut..... 72 kr. 50 øre h) 13,10-15,09 volumenprocent liiterimut..... 101 kr. 00 øre i) 15,10-18,09 volumenprocent liiterimut..... 125 kr. 00 øre j) 18,10-22,09 volumenprocent liiterimut 161 kr. 00 øre k) 22,10-26,09 volumenprocent liiterimut 205 kr. 00 øre</p>

<p>o) 60,10-100,00 volumenpct. literimut .. 436 kr. 92 øre 591 kr. 00 øre</p>	<p>l) 26,10-30,09 volumenprocent liiterimut..... 253 kr. 00 øre m) 30,10-35,09 volumenprocent liiterimut..... 308 kr. 00 øre n) 35,10-45,09 volumenprocent liiterimut..... 397 kr. 00 øre o) 45,10-60,09 volumenprocent liiterimut..... 544 kr. 00 øre p) 60,10-100 volumenprocent pr liiterimut..... 650 kr. 00 øre"</p>
<p>Nr. 7. Sikaat, sikaavaqqat cigarellollu, a) 3 gr. taannalu ataallugu oqimaassusillit ataaseq 1 kr. 30 øre, b) 3 gr. sinnerlugu oqimaassusillit ataaseq 1 kr. 58 øre</p>	<p>4. § 1, imm. 1, nr. 7, ima oqaasertalerneqassaaq: "Sikaat, sikaavaqqat cigarellollu, 1) 3 gram taannalu ataallugu oqimaassusillit ataaseq..... 1 kr. 43 øre 2) 3 gram, sinnerlugu oqimaassusillit ataaseq..... 1 kr. 73 øre"</p>
<p>Nr. 8. Sikaritsit ataaseq 2 kr. 23 øre</p>	<p>5. § 1, imm. 1, nr. 8, ima oqaasertalerneqassaaq: "Sikaritsit ataaseq 2 kr. 45 øre"</p>
<p>Nr. 9. a) Tupat aggukkat, cut plug, tupat aseqqorissut assigisaallu kiisalu tupat pujullit allat minnerpaamik 1,5 mm-imik silissusillitkg.-mut 492 kr. 00 øre. b) Tupat pujullit allat kg.-mut 1.165 kr. 00 øre. c) Sukuluut aamma snusit fakturami nalingisa 300%-iat. d) Tupat pujoqanngitsut allat fakturami nalingisa 300%-iat.</p>	<p>6. § 1, imm. 1, nr. 9, ima oqaasertalerneqassaaq: "Tupat pujullit, a) Tupat aggukkat, cut plug, tupat aseqqorissut assigisaallu kiisalu tupat pujullit allat minnerpaamik 1,5 mm-imik silissusillit kg.-mut 542 kr. 00 øre b) Tupat pujullit allat .. kg.-mut 1.282 kr. 00 øre Tupat pujoqanngitsut, c) Sukuluut aamma snusitfakturami nalingisa 300%-iat d) tupat pujoqanngitsut allat fakturami nalingisa 300%.-iat"</p>
<p>Nr. 10. Imusivissat, immertariaannaat ilanngullugit ataaseq 0 kr. 48 øre</p>	<p>7. § 1, imm. 1, nr. 10, ima oqaasertalerneqassaaq: "Imusivissat, immertariaannaat ilanngullugit ataaseq..... 0 kr. 52 øre"</p>

<p>Nr. 20. Qamuteralaat ataaseq 22.000 kr.</p>	<p>8. § 1, imm. 1, nr. 20, atorunnaarsinneqarpoq.</p>
	<p>9. § 1, imm. 1, nr. 27-p kingorna ilanngunneqassaaq: "Nr. 28. Puussiat plastikimik assigisaannillu sanaat. a) puussiat plastikimik assigisaannillu sanaat tigummiaviata tungaanut assigisaanulluunniit 5 literit taannaluunniit qaangerlugu imaqarsinnaasut ... ataaseq 3,00 kr. b) puussiat plastikimik assigisaannillu sanaat tigummiaviata tungaanut assigisaanulluunniit 5 literit ataallugit imaqarsinnaasut ataaseq 2,00 kr. "</p>
	<p>10. § 1-ip kingornagut ilanngunneqassaaq: "§ 1 a. Akitsuuteqarfiusumut nioqqtissanik ussassaarutitullu naqitanik inoqutigiinnut agguanneqartussanik eqqussinermi nioqqtissanik eqqussuineq annissuinerlu pillugit Inatsisartut inatsisaat nr. 18, 30. oktober 1992-imeersumi § 6 naapertorlugu nunatta karsianut nakkartussanik kiilumut ataatsimut 5 kr.-nik akitsuuteqartitsisoqassaaq, taamaattorli takuuk imm. 3. <i>Imm. 2.</i> Ussassaarutitut naqitat inoqutigiinnut agguassassat aalajangersagaq una malillugu tassaapput nioqqtissanik sullississutinilluunniit tuniniaaneq siuarsarniarlugu nassiunneqartut aammalu tiguisussamat akiliutitaqanngitsumik agguanneqartut. <i>Imm. 3.</i> Ussassaarutitut naqitat matuma kinguliani allassimasut akitsuummik akiliisussaatitaanermut ilaatinneqanngillat: 1) Allakkanik nassiussinerit allakkerineq pillugu Inatsisartut inatsisaanni nr. 3, 15. april 2011-imeersumi § 6, imm. 1-imi malittarisassat naapertorlugit aalajangersarneqartunut ilaatinneqartut. 2) Aviisit sapaatip akunneranut ataasiarluni saqqummersartut, aamma</p>

	3) Oqarasuaatit normuinut allattorsimaffiit.”
<p>§ 3. Akitsuuserneqartussaangitsut makkuupput:</p> <p>1) Qamutit motorillit, takuuk § 1, imm. 1/ nr. 21,</p> <p>...</p> <p>d) maskinat sulinermi atortut traktorillu aamma</p> <p>e) naalagaaffiit allat aallartitaqarfiinit konsuuleqarfiinilluunniit sulisunit tikisitanit pigineqartut.</p>	<p>11. § 3, nr. 1-imi c) kingorna ilanngunneqassaaq:</p> <p>”d) maskiinat sulinermi atortut traktorillu</p> <p>e) naalagaaffiit allat aallartitaqarfiinit konsuuleqarfiinilluunniit sulisunit tikisitanit pigineqartut, aamma</p> <p>f) biilit nunakkoorutit mikinerit sisamanik amerlanernilluunniit assakaasullit (ATV, UTV assigisaallu) taakku 500 kg-t sinnerlugit oqimaassuseqanngippata.</p>
	<p style="text-align: center;">§ 2</p> <p>Inatsisartut inatsisaat inatsisip nalunaarutigineqarnerata aqaguani atuutilissaaq, taamaattorli takuuk imm. 2.</p> <p><i>Stk. 2.</i> Siunnersuummi nr. 8 § 1, imm. 1, nr. 20-mut tunngasoq aatsaat ulloq 1. januar 2021-mi atuutilissaaq.</p>

3. Pisortanut aningaasaqarnikkut allaffissornikkullu kingunerisassat

Eqqussuinermit akitsuutinit 2020-mi 45,5 mio. kr.-t missaannik siunnersuut iluanaaruteqarfiussasoq missingerneqarpoq. Ukiut sisamat ingerlaneranni iluanaarutit katillugit 182 mio. kr.-nik amerlassuseqarnissaat naatsorsuutigineqarpoq. Iluanaarutit naatsorneqarneranni nioqqutissanik atuinerup appariaatissaatut naatsorsuutigineqartut ilanngullugit isiginiarneqarput.

Qamuterallannut ATV-mullu akitsuutit atorunnaarsinneqarnissaannik siunnersuutit iluanaarutit ukiumoortumik katillugit 6,5 mio. kr.-inik annaasaqarfiunissaat missingerneqarpoq, taakkulu ukiuni 2021-2023-mi 19,5 mio. kr.-nut naapertuupput.

Puussiananut nittarsaassutinullu naqitanut inoqutigiinnut agguaattakkanut akitsuutit pillugit siunnersuutit nutaajupput, taamaalillutillu taakku aqunneqarnissaannut nakkutilliivigineqarnissaannullu aningaasanik sulisunillu pisariaqartunik akileraartarnermut ingerlatsiviup aningaasaliiffigineqarnissamik pisariaqartitsilernissaanik taakku nassataqassapput. Akileraartarnermut ingerlatsivimmi aningaasanik sulisunillu atugassat ukioq naallugu sulisorisamik ataatsimik annertussuseqassasut missingerneqarpoq, 600.000 kr.-t missaannut naapertuuttut.

4. Inuussutissarsiutinik ingerlataqartunut aningaasaqarnikkut allaffissornikkullu kingunerisassat

Inuussutissarsiutinik ingerlataqartut akitsuutit qaffassutaat atuisunullu akigitinneqartunut akitsuutinik nutaanik pisussaaffilerneqarpata nioqqutissat pineqartut tunineqartarnerisa appariaateqalaarnissaat naatsorsuutigineqartariaqarpoq. Inuussutissarsiutinik ingerlataqartut taama appariaateqarnerisa taartissaattut nioqqutissat pineqartut allallu akii qaffassagaat ilimanaateqarpoq. Taamaattoqassappat siunnersuut inuussutissarsiutinik ingerlataqartunut aningaasaqarnikkut kinguneqassanngilaq.

ATV-nik qamuterallannillu eqquusuinermit akitsuutip atorunnaarsinneratigut angallatit taamaattut tunineqartut amerlissasut naatsorsuutigineqartariaqarpoq. Tamanna suliffeqarfinnut qamuterallannik ATV-nillu tunisaqartartunut iluaqutaassaaq.

Puussianik nittarsaassutinillu naqitanik inoqutigiinnut agguanneqartussanik eqquussisartut akitsuutit nutaat taamaattut aqutsiviginissaannut piffissami aalajangersimasumi sulisunut aningaasanillu atuinissamut immikkoortitsisariaqassapput. Malittarisassat nutaat atuutilerpata sulisunik aningaasanillu atuneq annikillissaaq.

5. Avatangiisinut, pinngortitamut innuttaasullu peqqissuunissaannut kingunerisassat

Puussianik plastikiniq atuneq annikillilluni tamatumunngalu taarsiullugu puussianik atoqqinneqarsinnaasunik atuisoqalernissaanik siunnersuut nassataqassasoq naatsorsuutigineqarpoq, taamaattumillu siunnersuutip tassunga tunngasortaa avatangiisinut silallu pissusaanut kiisalu taakku nassatarisaannik innuttaasut peqqinnerulernerannik pitsaasumik nassataqassasoq naatsorsuutigineqarpoq. Pingaarnertut iluaqutissat tassaassapput puussiap ikuallanneqarneranut atatillugu peqqinnangitsunik aniatitaqarnerup annikillinissaa, kiisalu puussiat pinngortitami qimaannarneqartut ikilinissaat.

Tamatuma saniatigut pinngortitamik mingutsitsinerup annikillinissaa naatsorsuutigineqarpoq. Plastikkit pinngortitamut qimaannarneqartarnerat annertuumik ajornartorsiutaavoq pinngortap ataqatigiissuseqarneranut sunniuteqartarmat. Plastiki nunguleraangami mikroplastinngortarpoq nunatsinni imaani avatangiisinut imaanullu sunniuteqarsinnaasumik, taamaalillunilu imissamut imaanullu pitsaangitsumik sunniuteqarsinnaalluni. Tamatuma saniatigut uumasut plastikiniq pinngortitamut qimaannarneqartunut pisaritissinnaapput uumasunilluunniit nerineqaratarsinnaallutik kingornagullu toqqutigalugu.

Aammattaaq ussassaarutiniq naqitanut inoqutigiinnut agguanneqartartunut akitsuummik atuinerup annikinnerulerneratigut, tamatumalu nassatarisaanik eqqagassalerinerup annikillineratigut avatangiisinut pinngortitamullu pitsaasumik kinguneqassasoq naatsorsuutigineqarpoq.

Sukkumik, sukkulaatinik, mamakujunnik, imigassamik aalakoornartortalimmik tupamillu atuinerup annertuumik appariaateqarnerani nunatsinni innuttaasut peqqissuunerat annertuumik pitsanngoriaateqassaaq. Ukiuni makkunani sukkornermik napparsimalersut amerleriarujussuarput, soorluttaaq napparsimasut imigassamik aalakoornartortalimmik ajoqusersimasut aammalu tupamik atuinerup kingunerisaanik ajoquteqalernerit assut ernumanartortaqtut.

ATV-nik qamuterallannillu tunisat amerlinerata nassatarisaanik angallatit taamaattut atornerarnerulissapput, taamaalillunilu CO₂-mik aniatitsineq akuutissanillu mingutsitsisarneq annertusissalluni.

6. Innuttaasunut kingunerisassat

Akitsuutit qaffannerisigut nioqqutissat pineqartut akii qaffassasut naatsorsuutigineqartariaqarpoq. Taamaalilluni akitsuutit pingaartumik nioqqutissanik atuisunit akilerneqassapput. Akit qaffannerisa nassatarisaanik nioqqutissanik taakkuninnga atuneq annikillissasoq ilimanaateqarpoq, taamaattumillu nioqqutissat akitsuutip qaffassutaanik annertunerusumik nioqqutissalluunniit allat akiinik qaffaanikkut inuussutissarsiutinik ingerlataqartut kaaviiartitaminni annaasatik taarsersinnaavaat.

Ataatsimut isigalugu atuisunut aningaasaqarnikkut kingunerisassat 2020-mi 48 mio. kr.-t ataannagit aningaasartuutaanerunissaat naatsorsuutigineqarpoq. Iluanaarutissani taakkunani nioqqutissanik atunerup appariaatissaatut naatsorsuutigineqartut ilanngullugit isiginiarneqarput.

Malittarisassat atuutsinneqalernerisa kingorna innuttaasut qamuterallannik ATV-nillu pisisut taakku akiisa appariaateqarnerat malugissagaat naatsorsuutigineqarpoq.

7. Kingunerisassat pingaarutillit allat

Siunnersuut pingaarutilinnik allanik kinguneqassanngilaq.

8. Oqartussanik kattuffinnillu il.il. tusarniaaneq

Siunnersuut aningaasanut inatsit pillugu isumaqatigiissummut atasumik suliarineqarmat tusarniutigineqanngilaq.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Akitsuutip annertussusia kiilumut ataatsimut 5 kr.-inik qaffanneqassasoq siunnersuutigineqarpoq.

Nr. 2-mut

Akitsuutip annertussusia kiilumut ataatsimut 5 kr.-inik qaffanneqassasoq siunnersuutigineqarpoq.

Nr. 3-mut

Akitsuutit annertussusiat 10 pct.-imik qaffanneqassasoq siunnersuutigineqarpoq.

Nr. 4-7-inut

Akitsuutit annertussusiat 10 pct.-imik qaffanneqassasoq siunnersuutigineqarpoq.

Nr. 8-mut

Qamuterallannut akitsuutip atorunnaarsinneqarnissaa siunnersuutigineqarpoq.

Nr. 9-mut

Akitsuutit ilaapput puussiat plastikimik assigisaannilluunniit sanaat, tassungalu ilaatigut ilanngullugit puussiat polymimik, ethylenimik kiisalu naasunit qerattarsaammik akullit nioqqutissanik angallassinermi nioqquteqarnermilu nalinginnaasumik atornerqartartut aammalu puussianit annoraaminermi sanaanik, pooqattanit, taskinit pooqattanillu assigisaannik avatangiisinut mingutsitsinngitsunik atalluarsinnaasunillu taarserluarneqarsinnaasut.

Puussianut tigummivia assigisaalluunniit tikillugu minnerpaamik 5 literimik imaqarsinnaasunut akitsuut puussiamut ataatsimut 3 kr.-uvoq.

Aamma puussiat mikinerit puussianit annoraaminermi sanaanik, pooqattanit, taskinit assigisaannillu taarserneqarluarsinnaapput, taakkuli puussianut anginerusunut sanilliullugu atoqqinneqarsinnaassusiat annikinnerussasoq ilimagineqartariaqarpoq. Puussianut mikinerit taamaattunut akitsuut puussiamut ataatsimut 2,00 kr.-nut aalajangersarneqassasoq siunnersuutigineqarpoq.

Tigummiviit assigisaalluunniit assersuutigalugu tassaapput nivvingaavillit imaluunniit qilerutitallit, kiisalu puussiaq assammik ataatsimik tigumiarneqarsinnaaqullugu tigummivissanik putullit assigisaalluunniit.

Puussiat pingaartumik matuneqarnissamut qileruteqarnertik pissutigalugu puussiaq ima

atorneqarsinnaasutut isigineqanngilaq puussianit annoraaminernit sanaanit il.il. taarserneqarluarsinnaalluni. Matuma assersuutigalugu eqqarsaatigineqarput eqqagassanut puussiat matuneqarnissamut qilerutitallit.

Oqaaseq ”assigisaalluunniit” inatsisilerinikkut oqariartaatsitut atorneqarpoq, puussiat sunik sanaajugaluartulluunniit nioqutissanik angallassinermut tuniniaanermullu atorneqartut tamarmik pineqarmata aammalu puussianit annoraaminernit sanaanit, pooqattanit, taskinit puussianilluunniit allanit assingusunit pilersinneqarnerminni iginneqarnerminniluunniit avatangiisinut ajoqutaanngitsunit atalluarsinnaasunit taarserneqarluarsinnaasut. Aamma ”assigisaalluunniit”-mik oqarnermi ilaatinneqarput siunissami atortussat ineriartortinneqarsinnaasut avatangiisinullu ajoqutaasinnaasut.

Akitsuuteqartitsinissamik piumasaqaammi ilaatinneqanngillat puussiat matoqqasut (ammarnaveersaatitallit) assersuutigalugu iggavimmi allartutissanut kòkkenrullinut equutissianullu atorneqartut, qerisunik nillartaatitassanillu uninngasuuteqarnissamut puussiat matusartullit, puussiaaqqat puussiatut atorneqartussatut naleqqutinngitsut, kiisalu puussiat tigungmivillit ammarnaveersaatitallit sillimaniarnermi piumasaqaatit nassatarisaannik mittarfinni niuertarfinni akileraarutitaqanngitsunik pisinermi atorneqartartut.

Puussiat taaguutaa atuuffissaaluunniit akitsuummik akiliisussaataitanermut apeqqutaanngillat.

Nr. 10-mut

Ussasaarutissatut naqitanut inoqutigiinnut agguaanneqartussanut eqqunneqartunut akitsuut kiilumut ataatsimut 5 kr.-uvoq.

Ussasaarutissatut naqitat akitsuummik akiliisussaanermut ilaatinneqassapput piumasaqaatit marluk eqquutsinneqarsimappata: 1) ussasaarutissatut naqitaq nioqutissanik sullississutinilluunniit siuarsaanissamut siunertaqarpat, aamma 2) ussasaarutitut naqitaq tigusisussamut akiliutitaqanngitsumik inoqutigiinnut agguaanneqarpat.

Inoqutigiinnut agguaassinerit tassaapput inuinnaat angerlarsimaffiinut, inuussutissarsiorfinnut, sunngiffimmi sammisassaqaartitsivinnut, utoqqaat illuinut, paaqqutarisariallit angerlarsimaffiinut, paaqqinnittarfinnut il.il. agguaassinerit. Tassa imaappoq allagaasivinnut, allagaasiveqarfinnut allakkanillu ikisivinnut postboksenullu allanulluunniit tigusisussaq isumaqatigalugu agguaassisarnerit. Taamaalilluni ussasaarutit allagaasivimmut ornigulluni ikineqarnissaa piumasaqaataanngilaq, assersuutigaluguli siunertamut naatsorsuussamut koorimut ikillugu inoqutigiilluunniit isaariaannut ilillugu inoqutigiinnut agguaanneqarsinnaavoq.

Nunap immikkoortuani killilimmi sumiiffimmiluunniit agguataarneqartumi inoqutigiinnut arlalinnut agguaassisooqartillugu tamanna ussasaarutissatut naqitanik inoqutigiinnut agguaassinertut isigineqassaaq. Tassunga atatillugu ussasaarutissanik inunnut ataasiakkaanut

nassiussisarnerit aammalu takuneqarsinnaasumik tiguisussumut qaatiguulerlugit immaqalu aqqit allallugit agguanneqartarnerat, tiguisussum najugaa immaqalu aqqa ussasaarutini ataasiakkaani allassimanersoq imaluunniit nunap immikkoortuani inoqutiginnut tamanut agguaassisoqarnersoq akitsuummik akiliisussaataitanermit apeqquataatinneqanngilaq.

Assersuutigalugu ilaqutariinnut meerartalinnut, kisermaanut inissiamiluunniit najugalinnut naatsorsuussanik ussasaarutissatut naqitat aalajangersimasunut nassiussaangitsut katitigaanerisa immikkoortitaarneqarnissaat siunertaralugu immikkoortukkuutaanut agguaassinerit akitsuummi tunngavigineqartumi aamma ilaatinneqassapput.

Niuertutut, sanasutut tunisassiorutulluunniit ingerlataqarnermut imaluunniit nioqqutissanik sullississutinilluunniit, tassungalu ilanngullugu illuutinik, piginnaatitsissutinik pisussaaffinnilluunniit tunisaqarnissaq siuarsarniarlugu tamanut ammasumik inuussutissarsiuqarnermut atatillugu ussasaarut sunaluunniit takussutissiaavoq.

Ussasaarummik nassiussisoq inuussutissarsiummik ingerlataqartumeersinnaavoq aammalu pisortat ingerlatsiviineersuusinnaalluni niuernermit niuernernulluunniit assingusumik atugassarititaasut malillugit nioqqutissanik sullississutinilluunniit neqerooruteqartartoq. Naqitat inuussutissarsiummik ingerlataqartup ingerlatai pillugit saqqummiunneqartut ussasaarut tunisaqarnerunissamik siunertaqarpat aallaavittut isigalugu ussasaarutitut isigineqassapput. Tamatumani apeqquataatinneqanngilaq naqitaq piffissani aalajangersimasuni saqqummiunneqartarnersoq imaluunniit aqqissukkani saqqummiussassanik imaqarnersoq. Naqitaq assersuutigalugu ikiuiniarnermik naalakkersuinermilluunniit suliniaqatigiiffinnit saqqummersinneqartoq akitsuuteqarnissamut pisussaaffimmi aatsaat ilaatinneqassaaq naqitaq inuussutissarsiummik ingerlataqarnermit aallaaveqartutut isigineqarsinnaappat. Tamatuma ilaatigut nassatarisaanik namminersorlutik oqartussat kommunillu paasissutissiissutaat (assersuutigalugu akileraarutit najukkamiluunniit pilersaarutit pillugit naqitat), naalakkersuinikkut partiinit paasissutissat, peqatigiiffiit nappaatinilluunniit akiuiniarnermit peqatigiiffinnit suliniaqatigiiffinnilluunniit katersuiniarnermit paasititsiniaanermiluunniit atortussat kiisalu upperisaqatigiinnit paasissutissat, soorlu najukkami oqaluffeqarnermit saqqummersittakkat inuussutissarsiornermik siunertaqarluni saqqummersitatut isigineqassanngillat, taamaattumillu akitsuummik akiliisussaataitanermit ilaatinneqassanatik.

Agguaassineq aamma tiguisussum akiliuteqartinnagu pissaaq. Timersornermik peqatigiiffinni, suliatiqut peqatigiiffinni, ikiuiniarnermik suliniaqatigiiffinni assigisaanniluunniit ilaasortanut ilaasortatut saqqummersittakkat akitsuummik akiliisussaataitanermit aamma ilaatinneqanngillat, agguaassineq ilaasortaanermit akiliut, pisartagaqarnermut assigisaalluunniit aqutugalugit tiguisussum akiliuteqarneratigut agguaassinertut isigineqarmat.

Ussasaarutit qanoq saqqummersinneqarnera atortussalluunniit suut atorlugit saqqummersinneqarnera apeqquataanngilaq.

Siunnersuut malillugu ussasaarutip inunnut aalajangersimasuunngitsunut nassiunneqarnissaa piumasqaataanngilaq. Ussasaarut najukkamik atermillu nalunaarneqarsimasoq aalajangersakkami ilaatinneqarpoq, taamaattumillu akitsuummik akiliisussaataitanermi ilaatinneqarluni.

Akitsuummik akiliisussaataitanermi ilaatigut ilaatinneqarput

- tuniniaalluni ussasaarutit nalinginnaasut, soorlu inuussutissanik pisiniarfeqarfinit akikilliliinermik aviisit imaluunniit ataatsimoortukkuutaanik immikkulluunniit pisiniarfinit tuniniaanermut quppersakkat,
- inuussutisarsiummik ingerlataqartumit, assersuutigalugu niuertarfissuarmit allakkat atuagassialluunniit inuussutissarsiornermik ingerlataqartup nioqutissiaminik nittarsaassutigisai, aamma
- nioqutissanik misiliissutissat.

Akitsuummik akiliisussaataitanermi assersuutigalugu ilaatinneqanngillat

- atuagassiani assigisaannilu akiliisarnermik aaqqissuussinerup malitsigisaanik tiguisussamut agguaanneqartuni ilanngussat, aamma
- ussasaarinermut naqitaq atuisup niuertarfimmi nammineq aasassai.

Aviisit sapaatip akunneranut ataasiarlutik saqqummersartut akitsuummik

akiliisussaataitanermi ilaatinneqassanngitsut siunnersuutigineqarpoq. Aviisit sapaatip akunneranut saqqummersartut ima paasineqassapput ussasaarutitut naqitikkat inoqutigiinnut agguaanneqartartut, soorlu

- 1) qaammatisiutit ukiuanni ataatsimi ikinnerpaamik qaammatini qulini qaammammut marloriarneqarlutik imaluunniit qaammatisiutit ukiuanni ataatsimi ikinnerpaamik sapaatip akunnerini 36-ni sapaatip akunneranut ataasiarlutik saqqummersinneqartartut,
- 2) assigiinngitsunit tiguisiffiusunik aaqqissuussinikkut imallit,
- 3) aaqqissuussinikkut atuagassiap nittarsaassutillu akornanni toqqaannartumik imminnut attuumassuteqanngitsut,
- 4) tunisassiamik ataatsimik aalajangersimasunilluunniit arlalinnit tunisiniarnerup siuarsarneqarnissaanik siunertaqanngitsut,
- 5) aaqqissuussineq eqqarsaatigalugu suliffeqarfiup aalajangersimasup niuernikkut nittarsaanneqarnissaanik siunertaqanngitsut,
- 6) saqqummersitap pingaarnertut anguniagaa niuernikkut nittarsaassinerunngitsoq,
- 7) agguaatigiissillugu agguaassinerit maliinnartut sisamat ingerlanerini aaqqissuinikkut minnerpaamik 10 pct.-imik imallit.

Aviisi sapaatip akunneranut saqqummersinneqartartoq arlanik immikkoortoqarpat

saqqummersitap saqqaani qupperillu qulaanni allassimasuni erseqqissumik allassimassaaq immikkoortoq tamanna aviisip sapaatip akunneranut saqqummersinneqartartup pinngitsuugassaannngitsumik ilagigaa aammalu quppernilersuinermi aviisip qulequtaa,

immikkoortup normua allassimassaaq immikkoortumilu quppernilersuineq ingerlaavartuussalluni. Immikkoortortat tamarmik pappiaqqap sananeqaataa ataaseq atorlugu pilersinneqassapput. Immikkoortut tamarmik piumasaqaatinik nr. 2-7-ip ataanni taaneqartunik naammassinnissapput.

Aammattaaq oqarasuaatit normuisa allattorsimaffii ilaatinneqassanngitsutut siunnersuutigineqarput. Oqarasuaatit normuisa allattorsimaffiinut atatillugu pineqarput ussasaarutit inoqutigiinnut agguanneqartut, soorlu

- 1) inuit, suliffeqarfiit, peqatigiiffiit nunallu immikkoortuani aalajangersimasumi pisortat oqartussaasuisa aqqinik, najugaannik oqarasuaataasalu normuinik pisortatigoortumik pissarsiarineqarsinnaasut annikinnerpaamik 80 pct.-iinik imallit,
- 2) ukiumut ataasiarlutik saqqummersartut,
- 3) nr. 1-imi oqaatigineqartutut nunap immikkoortuani ataatsimi agguanneqartut, aamma
- 4) annikinnerpaamik 60 pct.-imik aqqissuinnikkut atuagassianik imaqartut.

Taakku ilaatinneqannginnerat eqqortumik killilersuinissamut unammilligassaqartitsinnaavoq. Taamaattumillu suliassaqarfiup nakkutilliivigineqarneranut atatillugu eqqussuisut pisariaqarfiatigut mianerineqartariaqarput.

Nr. 11-mut

Inatsisitigut aqqissuinnikkut annikinnerusumik naleqqussakkat eqqaassanngikkaanni litra d aamma e allannortinneqanngillat.

Litra f-imi ilaatinneqarput angallatit nunakkoortit sisamanik amerlanernilluunniit assakaasullit mikinerit akitsuummit ilaatinneqassanngitsutut siunnersuutigineqartut.

Aalajangersakkami pineqarput angallatit soorlu ATV-t aamma UTV-t assigisaallu nunakkoortitit piukkunnaateqarlutik immikkoorteqartut, taamaalillutillu betonimik asfaltimillu qallersukkani manngertuni angalassutissatut atugassanngitsut. Angallatit nalinginnaasumik sisamanik assakaasoqartarput aammalu annikinnerusumik nassataqarnissamut atortoqarlutik. Angallatip aqutsissutai motorcykelit atortuinut eqqaanartunik atortut atorlugit aqutsissuteqarput.

§ 2-mut

Inatsit tamanut nalunaarutigineqarnerata aqaguani atuutsinneqalissasoq siunnersuutigineqarpoq. Taamaaliornikkut nioqqutissanik matumani pineqartunik eqqaanarsartoqaratarsinnaanera pinaveersimatinniarnearpoq.

Taamaattorli qamuterallannut ATV-mullu akitsuuteqartitsinnginneq pillugu aalajangersakkat aatsaat 1. januar 2021-mi atuutilissapput.